

【表】
宮川堤植櫻碑

川澤之勝得花柳而益成其佳墨江之於櫻花月瀨之於梅花嵐峽之於櫻與楓皆是也我宮川古有三津皆植櫻柳上曰柳渡中曰櫻渡下曰磯渡櫻渡即國道之津口其景勝可想而櫻樹漸枯朽無復可觀度會縣參事安岡良亮憂之欲新移植以復舊觀且使併柳渡皆櫻而邑人恐洪水之洗根土而破堤不肯邑長野村義雄體參事之旨百万諭說徵之往時證其必不然邑民乃服於是參事移植櫻樹三百五十株野村氏亦與其事時明治六年三月也其百五十株屬俗所謂山櫻種植之于中之渡口東岸其二百株屬俗所謂牡丹櫻種植之于上之渡口東岸而皆能長有至合抱者每歲花時白雲掩隄遊人絡繹猶墨江之隄嵐峽之壩矣宮川之勝於是乎倍舊時嘗聞飛州之某里櫻樹數百株夾水列植官為榜禁剪伐曾我耐軒幽討餘錄稱其事曰風流邑宰用心良苦蓋一佳話也雖然我參事移植之勞固不可同日而語也而野村氏之功亦不可沒頃者小川町民胥謀欲立碑以表之囑餘撰文乃據邑老之言叙其畧如此

大正五年三月

從五位勲五等置鹽藤四郎撰文篆額并書

永田 文治刻

○宮川堤植櫻碑

【裏】
大正六年一月十五日建

發起 小川町青年